

**«Արագածոտնի մարզպետ Աշոտ Սիմոնյանի շնորհավորական ուղերձը  
Անկախության տոնի կապակցությամբ**

Սիրելի՛ հայրենակիցներ,

Ի սրտե շնորհավորում եմ Անկախության տոնի առթիվ:

Հայոց պատմության մեջ սեպտեմբերի 21-ը ճակատագրական օր է: Ազգային գաղափարախոսությամբ տոգորված՝ ուղիղ 27 տարի առաջ այս օրը հայ ժողովուրդը միակամ եւ վճռականորեն «այո», ասաց անկախությանը: Մեկընդմիջտ հաստատվեց անկախ Հայաստան ունենալու մեր ժողովրդի բաղձալի երազանքը, իրականություն դարձան մեր նախնիների ազատ ու անկախ ապրելու դարավոր ձգտումն ու նպատակը:

Հայ ժողովուրդը անկախության համար պայքարել է դարեր շարունակ: Անկախ պետության վերածնունդը պատմության հրամայականն էր: Դա մեր ժողովրդի փրկության ճանապարհն էր, հաղթանակների ու ձեռքբերումների, կայացման ու ինքնահաստատման ուղին, ինչին մենք հասել ենք մեծ զոհողությունների գնով՝ դրսևորելով անսահման կամք ու հաստատակամություն:

Եվ արդեն 27 տարի է, ինչ մենք ընթանում ենք անկախության ճանապարհով՝ ազգովի հաղթահարելով մեր առջեւ ծառայած բոլոր դժվարություններն ու գրանցելով նոր ձեռքբերումներ: Վստահ եմ, որ յուրաքանչյուր հայ գիտակցում է անկախության արժեքը եւ այն պահպանելու գործում իր դերն ու պատասխանատվությունը:

Սիրելի՛ հայրենակիցներ, կրկին շնորհավորում եմ բոլորիս Անկախության տոնի առթիվ: Մաղթում եմ խաղաղություն, նորանոր հաղթանակներ եւ նվաճումներ՝ ի բարօրություն Մայր Հայաստանի ու հայ ժողովրդի: